

Mid-Day Dogri News Bulletin 29 Oct. 2025

समां - 12:25 hrs.

<><><><><><>

Assembly Proceedings

जम्मू-कश्मीर विधानसभा दी कारवाई अज्ज शानदार ते रमानदार तरीके कन्नै प्रश्नकाल दी शुरुआत कन्नै रम्भ होई जेहदे च केई विधायकें अपने बक्ख-बक्ख सोआल सदन च रखे ते सरकार कोला इंदे पर जवाब मंगे। प्रश्नकाल च कारवाई बड़े सोहार्दपूर्ण माहौल च चली। अज्ज असैम्बली च खास आकर्षण रेहा बॉलीवुड एक्टर मुकेश ऋषि दी मजूदगी जेहड़े स्पीकर हुंदी गैलरी च विधानसभा दी कारवाई दिखने लेई मजूद हे। उंदी मजूदगी दा सारे सुआगत कीता। स्पीकर अब्दुल रहीम राथर होरें उंदा सदन च सोआगत करदे होई आखेया जे उंदी मजूदगी सब्भनें लेई इक यादगार मौका रौहग।

<><><><><><>

CM Kashmir Marathon

मुख्यमंत्री उमर अब्दुल्ला होरें Royal Springs Golf Course च कश्मीर मैराथॉन 2025 दे समेयान दी रस्मी तौरा पर पड़दा गोआड़ियै सारे सामने प्रदर्शित कीता इस समेयान च टोपियां, तगमें, रेसिंग किट समेत होर चीजां बी शामिल हियां, जेड़ियां इस मैराथॉन च हिस्सा लैने आहले इस्तमाल करगंन। इस समारोह च सैलसफा विभाग दे अधिकारी ते मीडियाकर्मी बी मजूद हे। इस मौके पर मुख्यमंत्री होरें सब्भनें फिटनेस उत्साहितें गी कश्मीर

मैराथॉन-2025 दे दुए गेड़ च हिस्सा लैने आस्तै आखेया। एह मैराथॉन 2 नवम्बर गी करोआई जाग।

<><><><><><>

New Reasi Halt

रेल यात्रियें दी सुविधा लेई इक महत्वपूर्ण फैसला लैंदे होई उत्तरी रेलवै नै श्रीनगर कटड़ा वंदे भारत एक्सप्रेस रेल गड्डी लेई अज्जै थमां इक बाद्दू स्टॉप जोड़ेया ऐ। अज्ज यानि 29 अक्तूबर थमां रेलगड्डी नम्बर 26401, 26402 कटड़ा थमां श्रीनगर जंदे बाकी ते उत्थु'आं परतोंदे होई- दंऊ मिंटे लेई रियासी स्टेशन पर बी रुका करोग। रेलवे दे सीनियर डिविजनल कमर्शियल मैनेजर उचित सिंघल होरें जानकारी दिती ऐ जे एह फैसला यात्रियें दी बधदी मंग गी ध्यानै च रखदे होई लैता गया ऐ। टकोहदा करियै श्री माता वैष्णो देवी जी दी यात्रा पर औने आहलें लेई- जेहड़े उत्थुआं चिनाह ब्रिज दिक्खने जाना चाहंदे न। श्री माता वैष्णो देवी, शिवखोड़ी, भीमगढ़ किला ते होरनें कैई थहारें जाने आहलें लोकें लेई रियासी इक महत्वपूर्ण स्टेशन ऐ। लोकें इस पैहल लेई केन्द्र सरकार ते रेलवे विभाग दा आभार प्रगट कीता ऐ। अधिकारियें दा आखना ऐ कि इस नमें स्टॉप कन्नै इत्थे सैलसफा च बाद्दा होग, यात्रियें गी सुविधा होग ते इलाके च आर्थिक गतिविधियें गी बी बढ़ावा थोग।

<><><><><><>

CS Recruitment Rules

मुख्य सचिव अटल डुल्लू होरें जम्मू-कश्मीर दे सब्भनैं सरकारी मैहकमें च भर्थी नियमें दे डिजिटलीकरण ते उनेंगी तरतीब देने दे मकसद कन्नै कीते जा'रदे सुधारें दे कम्मैं च हासल प्रगति दा जायजा लैने लेई कल इक उच्ची सतह दी बैठक दी अध्यक्षता कीती। इस पैहल दा मकसद सरकारी नौकरियें दे नियमें यानि सर्विस रूल्स तयार करने ते उनेंगी इक्कै थाहर सिगल विंडो सिस्टम राएं मंजूरी देने दे कम्मैं च कुशलता-पारदर्शता ते जवाबदेही जकीनी बनाना ऐ। मुख्य सचिव डुल्लू होरें इस दौरान निर्देश दिता जे इस कम्मैं लेई तयार कीता गेदा डिजिटल पोर्टल 10 नवम्बर 2025 तगर पूरी चाल्ली चालू होई जाना लोड़चदा- जेहदे च मलाजमें दी तरक्की-सीनियैरिटी लिस्ट ते मंजूरियां वगैरा सब किश शामिल होग। अधिकारियें दा आखना ऐ कि इनें सुधारें कन्नै समें-सिर मंजूरी हासल करने दे कन्नो-कन्नी इत सरबन्धि सब्भनैं कम्मैं च कुशलता ते सुधार जकीनी बनोग।



Prog. Announcement

आकाशवाणी जम्मू दे क्षेत्रीय समाचार एकांश आस्सेया “स्वच्छ भारत मिशन ग्रामीण” बारे 25 मिन्टे दी इक विशेष परिचर्चा 30 अक्टूबर दपैहरी 12 बजे प्रसारित कीती जाग। एह कार्यक्रम स्वच्छता पखवाड़ा -2025 दे समापन दे सरबन्धै च ऐ। इस कार्यक्रम च साड़े परौहने होगन Rural Sanitation Jammu दे डिप्टी डायरेक्टर जहीर अब्बास जेड़े इस पर अपने माहिराना विचार सांझा करंगन। उन्दे कन्नै गल्ल करंगन समाचार कक्ष थमां श्रूति खजूरिया। इस कार्यक्रम गी तुस आकाशवाणी जम्मू पर Medium Wave 303 मीटर यानि 990 Khg. ते FM 100.3 Mhz पर सुनी सकदे ओ।



Jhiri Mela Prep.

उत्तर भारत दे सब्भनें शा बड़्डे लोक मेलें चा इक झिड़ी दे मेले गितै त्थारियें दा जायजा लैने लेई IGP जम्मू भीम सेन टूटी होरें कल मेले आहली थाहरै दा दौरा लाया ते उत्थे सुरक्षा सनें होरनें प्रबंधें दी समीक्षा कीती तां जे इस सलाना आयोजन गी पूरी चाल्ली सुरक्षत, रमानदारी ते बवस्था आहले ढंगे सिर तोड़ चाढ़ना जकीनी बनी सकै ते मुख्ये दे बक्ख-बक्ख हिस्सें थमां औने आहले श्रद्धालुएं गी कुसै चाल्ली दी दिक्कत-परेशाना दा सामना नैई करना पवै। दौरे दौरान IGP हुंदे कन्ने पुलिस दे सीनियर अफसर, फौज, सिविल प्रशासन, नीम फौजी बलें दे प्रतिनिधि, भीड़ प्रबंधन ते सुरक्षा तालमेल सरबंधि अधिकारी बी मजूद हे। इस मौके IGP टूटी होरें जोर देइयै आखेया जे सुरक्षा नियमें दी सख्ती नै पालमा कीती जा ते बक्ख-बक्ख एजेंसियां आपु-च नेइमा तालमेल बनाइयै कम्म करन तांजे मेले दौरान पूरी सुरक्षा जकीनी बनी सकै। सरबंधित अधिकारियें, उनेंगी जकीन दोआया जे लोड़चदियां सुविधां ते त्थारियां जिंदे च आपात स्थिति दरान लोड़ पेई सकने आहलियां सब्भै बवस्था बी शामिल न, करी रखी गेदियां न।



Traffic Restrictions

बरे च दंडू बारी होने आहली दरबार मूव दी प्रक्रिया दे चलदे जम्मू-कश्मीर ट्रैफिक पुलिस नै पैहली ते 2 नवम्बर गी जम्मू-श्रीनगर राष्ट्रीय जरनैली सिड़कें पर किश पाबंदियें दी घोषणा कीती ऐ। दरबार मूव दियें गड़्डियें दी बवस्थित ते निर्विघन आओ-जाई यकीनी

बनाने लेईं इनें दंऊ दिने दौरान गड्डियें गी छड़ा श्रीनगर थमां जम्मू आहली बक्ख औने दी इजाजत दिती जाहग ते कुसै बी गड्डी गी जम्मू थमां घाटी आहली बक्खी जाने दी खुल्ल नैई होग, जिंदे च बड्डे ट्रक ते टैंकर, नीम फौजी बलें दियां गड्डियां ते होर सरकारी कानवाई बी शामिल ऐ गी घाटी आहली बक्खी नैई जान दिता जाहग। इस दौरान श्रीनगर, रामबन, उधमपुर ते जम्मू दे ट्रैफिक कंट्रोल रुम दिन-रात कम्म करगंन। सब्भनै गड्डी चालकें गी आखेया गया ऐ जे ओ अपनी यात्रा दी तयारी इनें बंदशें गी ध्यानै च रखदे होई गै करन।

<><><><><><>